



UKA 2016/50-01+ 36-01

13-10-2016

Inatsisartunut aaliangiiffigisassatut siunnersuut Naalakkersuisut UPA 2017-imut peqquneqassasut inuusuttut 16-iniit 29-nik ukiullit ilanngullugit suliffissarsiortutut allatsissimasut, ilinniagaqalernissaat suliffittaarnissallu siunertaralugu immikkut ittumik pilersaarusiussasut.

(Inatsisartunut ilaasortaq Múte Bourup Egede, Inuit Ataqatigiit)

Ullutsinnut naleqquttumik ingerlatsinikkullu illersorneqarsinnaasumik Inuusuttut Inuiaqatigiinni Kiffartuussisarnerisa eqquteqqinneqarnissaanik inassuteqaasiortussamik suleqatigiissitamik Naalakkersuisut pilersitseqqullugit peqquneqarnissaannik Inatsisartut aalajangiiffigisassaattut siunnersuut. Inernera Inatsisartunut saqqummiunneqassaaq UPA2017-imi.

(Siumup Inatsisartunut ilaasortaaitai)

Inatsisartunut ilaasortap Mute Bourup Egede-ip Inuit Ataqatigiinneersup, inatsisartunut aaliangiiffigisassatut siunnersuutaa, tassa Naalakkersuisut UPA 2017-imut peqquneqassasut inuusuttut 16-iniit 29-nik ukiullit ilanngullugit suliffissarsiortut allatsissimasut, ilinniagaqalernissaat suliffittaarnissaallu siunertaralugu immikkut ittumik pilersaarusiornissaanut tunngasoq kiisalu

Ullutsinnut naleqquttumik ingerlatsianikkut illersorsinnaasumik Inuusuttut Inuiaqatigiinni Kiffartuussisarnerisa eqquteqqinneqarnissaannik inassuteqaasiortussamik suleqatigiissitamik Naalakkersuisut pilersitseqqullugit peqquneqarnissaannik Siumup inatsisartunut klaasortaaitaasa Inatsisartut aalajangiiffigisassaattut siunnersuutaat ataatsimoortillugit Partii Naleraq sinnerlugu imannak oqaaseqarfigissuagut:

Aallaqqaasiullugua Partii Naleqqamiit erseqqissaatigissuarput, inuiaqatigiinni ajornartorsiutit suulluunniit torrutiinnarlugu iluarsiniarneqarsinnaaneri ajornakusoorsinnaammata nalunnginnatsigu.

Taamaattumik isumaqarpugut ajornartorsiutit suulluunniit tamakkiisumik ataavartumillu iluarsineqarnissaat qulakkeerneqassapat, taava ajornartorsiutip aallaavia qiterisaalu paasilluassallugit pisariaqartoq pingaaruteqarlunilu.

Taamaammat maannamut ajornartorsiutit nalunngisatta ilisimariikkattalu sutigut iluarsineqarnissaat ilanngullugit isigasariaqarivut aaqqiivigisariaqarivullu pingaaruteqartoq isumaqarpugut.

Tassani qiviagassat iluarsisariallillu siulliit ilagaat meeqqat atuarfianniit inuusuttuararpassuit ilinniakkamik aallartitsinngitsoortarnerannut pissutaasartut iluarsiniassallugit. Tassami inuusuttut amerlasuut suliffissaaruttarnerannut pissutaanerpaanut ilaammat, ilinniakkamik aallartitsinngitsoortarnek karakterit appasippallaartarnerat, soorlu nalunaarsuinermi tamanna takuneqarsinnaasoq.

Taamaammat meeqqat atuarfianni kultur-itta oqaatsittalu atuartitaanermi ilinniartitaanermilu qitiutinneqarnissaat pisariaqarlunilu pingaaruteqartorujussuusoq erseqqissaqqikkusupparput.

Tassami maannamut ukiorpassuanngortuni meeqqat atuarfianni atuartitsinikkut angusaasartut ataatsimut isigalugit pitsaanerpaajunngitsut takusinnaareerparput aamma naluneqanngereerpoq meeqqat atuarfianniit anisartut affai sinnerlugit ilinniakkamik aallartitsinngitsoortartut ilisimaneqareerpoq.

Amma takoreerparput Ilinniusiorfimmiit atuakkat saqqummersinneqartartut ikigisassaanngikkaluartut.

Taamaattumik meeqqat atuarfianni iluarsisassat pimoorunnerullugit aaqqissuuteqqinneqartariaqarput. Isumaqarpugut taamaalioritta siunissami inuusuttut ilinniakkamik aallartitsinissamut periarfissaat pitsaanerulersinneqarsinnaasut.

Isumaqarpugut atuartitaaneq ilinniartitaanerlu kalaallit kulturitsinnut oqaatsitsinnullu naleqquttunngorlugu aaqqissuunneqartariaqartoq aamma pissusissamisoornerpaajussooq, atuartitaaneq ilinniartitaanerlu nunatsinni innuttaasunut ulluinnarni atugassarititaasut aallaavigalugit ingerlanneqarpat.

Soorunami aamma Partii Naleqqamiit pingaartipparput pisariaqarmat, ilinniartitaanerup qaffasissumik angusaqarfiulluartumillu ingerlannaqarnissaa.

Inuusuttorpassuaqarpoq pikkorissunik, kisianni atorumaneqanngitsunik, sulisorineqarusunngitsunik, ilinniarfinniluunniit tigujumaneqanngitsunik, tassagooq danskisut pisinnaasaat amingarineqarmata, aali namminneq nunaminniittut ?

Sumimita nunami allami atuartitaanikkut ilinniartitaanikkullu imminnut nunaminnullu naleqqussarsimannahitsunik inoqarpa ?

Silattorujussuartaariaqalerpugut, siulivummi nunamut maanga naleqqussarnermikkut maani nunami inuuniarnikkut ilungersunarsinnaasaraluartumi, inuuniapiloornarsinnaasaraluartumilu, nunap massuma inuiannik allanik inuuffigineqarsinnaasimannngitsumi inoqartuaannarsinnaasimanera angusimavaat.

Taamaattumik atuartitaanikkut ilinniartitaanikkullu nunatsinnut, kulturitsinnut oqaatsitsinnullu naleqquttumik ingerlatsinissarput pisariaqarluinnarpoq.

Soorunami siumup inatsisartunut ilaasortaataa Mute Bourup Egedellu inuit ataqatigiinniit aaljangiiffigisassatut siunnersuutaat taperserpugut suliffissaaleqinerup akiornissaanut iluaqutaasinnaammata.

Tassami misilittangaareersimasut aamma nalilersuinermi uterfigisinnaanerit pisariaqartarpoq, soorlu inatsisartunut ilaasortat siumumeersut inuiaqatigiinni kifpartuussarsimanerit pillugit oqallisissiaqartut. Aammalu inatsisartunut ilaasortaq Mute Bourup Egede suliffissaaleqisut immikkut ittumik pilersarusiunneqarnissaat pillugu siunnersiuteqartoq.

Isumaqarpugut isummat siunnersuutillu tamaasa ataatsimut katillugit aaqqiiniartariaqartigut.

Aamma nalilersuinermi iluarsiniarnernilu suliffissaaleqisut assigiinnginnerat, pisinnaasaat pisinnaanngisaallu tamaasa ilanngullugit eqqaamaneqartariaqartut.

Tassami taamaaliunngikkaanni inuusuttorpassuit, ilaqutariit inuppassuillu ataasiakkaat katangartuassuagut, taamaammat suliffissaaleqisorpassuit inuiaqatigiinni tamanut iluaqutaalersinniarlugit tamatta ikioqatigiittariaqarpugut.

Taama oqaaseqarluta siunnersuutit aappassanneeraneqannginnerini ataatsimiititaliami susassaqrifiusumi suliarineqarnissaat inassutingaarput.